



### গণআন্দোলন নিয়ে ফারুকীর তথ্যচিত্র

১২ নভেম্বর মুক্তি পায় জুলাই-আগস্টের গণআন্দোলন নিয়ে নির্মিত একটি তথ্যচিত্র। অন্তর্বর্তী সরকারের প্রধান উপদেষ্টা ড. মুহাম্মদ ইউনূসের উদ্যোগ ও তত্ত্বাবধানে নির্মিত হয় তথ্যচিত্রটি। তথ্যচিত্রটি নির্মাণ করেন মোস্তফা সরয়ার ফারুকী। দেড় মিনিটের ভিডিওটি তৈরি হয় আন্দোলনে চোখ হারানো ব্যক্তিদের নিয়ে। এতে ব্যবহৃত হয় লতিফুল ইসলাম শিবলীর লেখা মাইলস ব্যান্ডের নব্বইয়ের দশকের জনপ্রিয় ‘পলাশীর প্রান্তর’ গানটি। শাফিন আহমেদের সুর করা গানটিতে নতুন করে কণ্ঠ দেন আহমেদ হাসান সানি। গানটি নিজের ফেসবুকে শেয়ার করেছেন ড. ইউনূস। ক্যাপশনে লিখেছেন, ‘এসো দেশ বদলাই পৃথিবী বদলাই’ জুলাই আমাদের সেই জিরো পয়েন্ট যেখানে সব মত পথ এসে মিশে যায়। জুলাইয়ের গণআন্দোলনে চোখ হারানো বন্ধুদের নিয়ে এই ট্রিবিউট ভিডিও। আমরা ভুলবো না কিছুই।

### ‘লাল গোলাপ’ নিয়ে ফিরলেন শফিক রেহমান

প্রায় ৮ বছর পর ‘লাল গোলাপ’ অনুষ্ঠান নিয়ে টেলিভিশনের পর্দায় ফিরলেন বরণ্য সাংবাদিক, উপস্থাপক শফিক রেহমান। অনুষ্ঠানটিতে একটি নির্দিষ্ট বিষয় নিয়ে কয়েকটি অংশ থাকে। আবারও শুরু হওয়া অনুষ্ঠানটির প্রথম পর্বে অতিথি হিসেবে ছিলেন ক্যাপ্টেন রেজাউর রহমান। এ সময় ‘কাজের খোঁজ’ বিষয় নিয়ে আলোচনা করেন তিনি। প্রতি সপ্তাহের রবিবার রাত ১১টা ৩০ মিনিটে বাংলাভিশনের পর্দায় দেখা যাবে এই অনুষ্ঠানটি। বিএনপি-জামায়াত জোট সরকারের সময় বিটিভিতে ‘লাল গোলাপ’ প্রচার হয়েছে। এই অনুষ্ঠানে তিনি আমন্ত্রিত অতিথিকে একটি লাল গোলাপ দিয়ে শুভেচ্ছা জানাতেন। পরে ২০১০ সাল থেকে বেসরকারি টেলিভিশন বাংলাভিশনে অনুষ্ঠানটি প্রচার হতে দেখা যায়।



### দশ ভাষায় ‘শান’ সিনেমা মুক্তি পাচ্ছে

ভারতের জি বাংলা সিনেমায় ১০ নভেম্বর প্রদর্শিত হয় বাংলাদেশের এম রাহিমের পরিচালিত ‘শান’ সিনেমা। সিয়াম আহমেদ ও পূজা চেরি অভিনীত ছবিটি দুই বছর আগে মুক্তি পায়। গত বছর ছবিটি ‘হিন্দি ডাবড মুভিজ’ নামের ইউটিউব চ্যানেলে হিন্দিতে প্রকাশিত হয়, সেখানে এখন পর্যন্ত ৬৫ লক্ষের অধিক মানুষ দেখে। শুধু বাংলা-হিন্দি নয়, পরিচালক জানান পর্যায়ক্রমে ছবিটি তামিল-তেলুগুসহ ভারতের মোট ১০ ভাষায় মুক্তি পাবে। ‘শান’ সিনেমাতে মুখ্য ভূমিকায় অভিনয় করেছেন সিয়াম আহমেদ। তার বিপরীতে অভিনয় করছেন পূজা চেরি। এ ছাড়া ছবিটিতে অভিনয় করেছেন তাসকিন রহমান, সৈয়দ হাসান ইমাম, চম্পা, অরুণা বিশ্বাস প্রমুখ।

### ম্যাথু পেরির বাড়ি ১০০ কোটি টাকায় বিক্রি

অভিনেতা ম্যাথু পেরির নিজের বাড়িটি বিক্রি করে দিয়েছেন। তিনি প্যাসিফিক প্যালিসেড হোমের এ বাড়িতেই মারা যান। বাড়িটি ক্রয় করেন অনিতা বর্মা-ল্যালিয়েন। তিনি একজন ভারতীয় বংশোদ্ভূত রিয়েল এস্টেট ডেভেলপার ও চলচ্চিত্র প্রযোজক। বাড়িটি কিনতে তিনি খরচ করেছেন ৮৫ লাখ ৫০ হাজার ডলার। বাংলাদেশি মুদ্রায় এর পরিমাণ প্রায় ১০১ কোটি ৫০ লাখ টাকা। বাড়িটি কেনার পাশাপাশি সেখানে একটি অনুষ্ঠান করেছেন অনিতা। তবে কোনো আনন্দ-উৎসব নয়, তিনি একটি পূজার আয়োজন করেন। সেই সঙ্গে পেরিকে সম্মানও জানিয়েছেন অনিতা।



### ঢাকা আন্তর্জাতিক চলচ্চিত্র ২৩তম উৎসব

আগামী বছরের ১১ জানুয়ারি থেকে শুরু হতে যাচ্ছে ৯ দিনব্যাপী ঢাকা আন্তর্জাতিক চলচ্চিত্র উৎসবের ২৩তম আসর। এই উৎসবে বাংলাদেশসহ ৭০টি দেশের ২২০টি সিনেমা জায়গা করে নিয়েছে। রেইনবো চলচ্চিত্র সংসদের উদ্যোগে ‘নান্দনিক চলচ্চিত্র, মননশীল দর্শক, আলোকিত সমাজ’ স্লোগানকে সামনে চলচ্চিত্র উৎসব শুরু হবে। একই মাসের ১৯ তারিখ উৎসবটির পর্দা নামবে। এবারের উৎসবের বিভিন্ন বিভাগের কয়েকটি ছবি চূড়ান্ত হয়েছে। এর মধ্যে বাংলাদেশ প্যানোরমা বিভাগে এ পর্যন্ত আটটি সিনেমা চূড়ান্ত হয়েছে। এগুলো হলো কুসুম সিকদারের ‘শরতের জবা’, মেহেদী রনির ‘এখানে নোঙর’, প্রব হাসানের ‘ফাতিমা’, নিয়ামুল হাসান মুক্তার ‘রক্ত জবা’, ইকবাল হোসাইন চৌধুরীর ‘বলী’, তানভীর মুহাম্মদের ‘বাতাসের ফেনা’, বিপ্লব সরকারের ‘আগন্তুক’ ও তৌফিক এলাহির ‘নীলপদ্ম’। এ ছাড়া দেশের প্রায় ৪০টি স্বল্পদৈর্ঘ্য ছবিও প্রদর্শিত হবে উৎসবে।





## আট বছর পর ফিরছে 'আইস এজ'

প্রাইস্টোসিন যুগে ফিরে যেতে প্রস্তুত হোন। এটা এমন একটা সময়, যখন সারা পৃথিবী ঢাকা ছিল বরফে। ওই প্রতিকূল পরিস্থিতিতে যে সব স্তন্যপায়ী প্রাণী টিকে ছিল, তারা উঠে এসেছে অ্যানিমেশন সিনেমা 'আইস এজ'-এর চরিত্র হয়ে। ২০০২ সালে আসে প্রথম পর্ব। এরপর একে একে এসেছে দশটি পর্ব। এ ফ্রাঞ্চাইজির সর্বশেষ সিনেমা 'আইস এজ: কলিশন কোর্স' মুক্তি পায় ২০১৬ সালে। এরপর দীর্ঘ আট বছর পর এলো ষষ্ঠ পর্বের ঘোষণা। সম্প্রতি ডি২৩ ব্রাজিল সম্মেলনে জানানো হয় এ খবর।



## কলরবের গজলে অভিনেতা আবুল হায়াত

এবার ইসলামী সঙ্গীতে দেখা গেল কিংবদন্তি অভিনেতা ও নাট্যশিল্পী আবুল হায়াতকে। জনপ্রিয় ইসলামী সঙ্গীত সংগঠন কলরবের পরিচিত মুখ মুহাম্মদ বদরুজ্জামানের কণ্ঠে 'মিছে দুনিয়া' শিরোনামে মরমি গজলের ভিডিওতে অভিনয় করেন তিনি। একটি বাড়ির পর্যায়ক্রমে তিন প্রজন্মের মালিক হওয়ার গল্পে প্রথম পুরুষ চরিত্রে অভিনয় করেন এই বরেন্য শিল্পী। আবুল হায়াতের সঙ্গে এতে আরো অভিনয় করেন মিডিয়ার জনপ্রিয় মুখ রকি খান, তারেক জামানসহ অন্য শিল্পীরা। ২৮ নভেম্বর হলি টিউন নামক ইউটিউব চ্যানেলে গানটি মুক্তি পায়।

## মাদককাণ্ডে আটক নেটফ্লিক্স তারকা

নেটফ্লিক্সের তারকা ওলগা বেডনারস্কা। ৩০ নভেম্বর প্রায় ২ কোটি টাকার বেশি মূল্যের গাঁজাসহ যুক্তরাজ্যে ধরা পড়েন তিনি। নেটফ্লিক্সের 'টু হট টু হ্যান্ডেল' শো দিয়ে তারকাখ্যাতি পান ওলগা বেডনারস্কা। যুক্তরাজ্যে ক্লাস বি মাদক আমদানির কারণে তাকে গ্রেপ্তার করা হয়। আদালত জানায়, তাকে ১৫ দিন পুনর্বাসন কার্যক্রমে অংশ নিতে হবে। তাকে ২০ মাসের অস্থায়ী সাজাও দেওয়া হয়। সেই সাজায় উল্লেখ করা হয়, অভিনেত্রী যদি ২০২৬ সালের নভেম্বরের মধ্যে কোনো অপরাধ করেন তবে তাকে ২০ মাস জেল খাটতে হবে। দুটি সূটকেসে ১ লাখ ৫৭ হাজার ইউরো মূল্যের 'ক্লাস বি' মাদক শনাক্ত করেন। বাংলাদেশি টাকায় এর মূল্য প্রায় ২ কোটি ৩৭ লাখ টাকারও বেশি।



## সম্মাননা পাচ্ছেন শিমূল ইউসুফ ও জাহাঙ্গীর আলম

বুদ্ধিজীবী, শিক্ষাবিদ ও গবেষক শহীদ অধ্যাপক মুনীর চৌধুরীর শততম জন্মদিন উপলক্ষে মুনীর চৌধুরী সম্মাননা এবং মোহাম্মদ জাকারিয়া স্মৃতিপদক প্রাপকদের নাম ঘোষণা করে নাট্যদল থিয়েটার। এ বছর মুনীর চৌধুরী সম্মাননা পাচ্ছেন অভিনেত্রী ও সঙ্গীতশিল্পী শিমূল ইউসুফ। মোহাম্মদ জাকারিয়া স্মৃতিপদকের জন্য মনোনীত হয়েছেন প্রাচ্যনাট্যের অভিনেতা জাহাঙ্গীর আলম। শহীদ মুনীর চৌধুরী স্মরণে ১৯৮৯ সাল থেকে একজন করে প্রবীণ গুণীকে সম্মাননা এবং মোহাম্মদ জাকারিয়া স্মরণে ১৯৯৭ সাল থেকে একজন তরুণ গুণীকে পদক দেওয়া হচ্ছে।

## বিনা পারিশ্রমিকে ঢাকায় গাইবেন রাহাত ফতেহ আলী খান

আগামী ২১ ডিসেম্বর রাজধানীর আর্মি স্টেডিয়ামে 'ইকোস অব রেভল্যুশন' শিরোনামে একটি চ্যারিটি কনসার্ট অনুষ্ঠিত হবে। কনসার্ট থেকে আয়কৃত অর্থ জুলাই গণঅভ্যুত্থানে শহীদ ও আহতদের পরিবারকে সহায়তার জন্য শহীদ জুলাই স্মৃতি ফাউন্ডেশনে দান করা হবে। কনসার্টে বিশ্বখ্যাত সঙ্গীতজ্ঞ রাহাত ফতেহ আলী খানসহ কয়েকটি জনপ্রিয় দেশীয় ব্যান্ড গান পরিবেশন করবে।





## সোলস ছাড়লেন নাসিম আলী খান

৫০ বছর পূর্তি উপলক্ষ্যে দুই মাসের জন্য যুক্তরাষ্ট্র সফরে যায় ব্যান্ড সোলস। সেই সফরে ছিলেন না ভোকালিস্ট নাসিম আলী খান। সেই সময় গুঞ্জন উঠেছিল, সোলসের সঙ্গে ৪৫ বছরের সম্পর্কের ইতি টানছেন কণ্ঠশিল্পী নাসিম। গুঞ্জন সত্যি হয়েছে। সম্প্রতি তিনি জানান, তিনি আর সোলসে নেই। মূলত তিনি একজন ব্যবসায়ী। ঢাকার বাইরে কিংবা দেশের বাইরে টানা তিন মাস বা দুই মাস থাকা সম্ভব হয় না তার জন্য। ৪৫ বছর ছিলেন, কিন্তু এখন পারছেন না। সোলস ব্যান্ডে না থাকলেও এককভাবে গান চলিয়ে যাবেন তিনি।



## মুক্তি পেল আইয়ুব বাচ্চুর অপ্রকাশিত গান

দেশের কিংবদন্তি শিল্পী আইয়ুব বাচ্চু অনন্তর উদ্দেশে পাড়ি জমিয়েছেন আজ থেকে ছয় বছর আগে। ১ ডিসেম্বর 'বাংলাদেশ ব্যান্ড মিউজিক ডে' উপলক্ষ্যে প্রকাশ করা হয় 'ইনবক্স' শিরোনামের গান। এলআরবির অফিশিয়াল ফেসবুক পেজে এ ঘোষণা দেওয়া হয়। আইয়ুব বাচ্চুর রেকর্ডিং স্টুডিও এবি কিচেনের হার্ডডিস্কে এমন অনেক গান আছে, যেগুলো এখনো অপ্রকাশিত। সেই অপ্রকাশিত গানগুলো একে একে প্রকাশ করার পরিকল্পনা নিয়েছে আইয়ুব বাচ্চু ফাউন্ডেশন। সেই পরিকল্পনা অনুযায়ী প্রথম গান 'ইনবক্স' প্রকাশ পাচ্ছে।

## ঢাকা ক্যাপিটালসের সঙ্গে খেলবেন শোবিজ তারকারা

শাকিব খান সম্প্রতি যুক্ত হয়েছেন ক্রিকেটের সঙ্গে। শাকিবের ব্যবসায়িক প্রতিষ্ঠান রিমার্ক-হারল্যান্ড দল কিনেছে বিপিএলে। দলের নাম ঢাকা ক্যাপিটালস। শাকিবের ঢাকা ক্যাপিটালসের সঙ্গে ম্যাচ খেলবেন দেশের শোবিজ তারকারা। এমনটাই জানালেন শাকিবের ব্যবসায়িক প্রতিষ্ঠান রিমার্ক-হারল্যান্ডের শুভেচ্ছাদূত চিত্রনায়ক সিয়াম আহমেদ। খুব শীঘ্রই জানানো হবে ম্যাচের তারিখ। এবার বিপিএলে শাকিবের ঢাকা ক্যাপিটালসে খেলবেন মোস্তাফিজুর রহমান, তানজিদ হাসান, লিটন দাস, খিসারা পেরেরা, সাব্বির রহমানসহ দেশ-বিদেশের আরও অনেক তারকা খেলোয়াড়। গত বছর শোবিজ তারকাদের নিয়ে ক্রিকেট লিগের আয়োজন করেছিল জেনারেশন নেব্রট। তবে খেলা চলাকালে তারকাদের মধ্যে হাতাহাতি হলে আয়োজনটি শেষ করা সম্ভব হয়নি।



## চলে গেলেন 'পথের পাঁচালী'র দুর্গা

সত্যজিৎ রায়ের 'পথের পাঁচালী' সিনেমায় 'দুর্গা' চরিত্রে অভিনয় করে বিশ্বজোড়া খ্যাতি পাওয়া অভিনেত্রী উমা দাশগুপ্ত মারা গেছেন। ১৮ নভেম্বর সকালে কলকাতার এক বেসরকারি হাসপাতালে চিকিৎসাধীন অবস্থায় তার মৃত্যু হয়।



চিকিৎসক জানান দীর্ঘদিন ধরে ক্যানসারে ভুগছিলেন তিনি। ১৯৫৫ সালে সত্যজিৎ রায়ের 'পথের পাঁচালী'তে ছিলেন 'অপু'র দিদি 'দুর্গা'। কিশোরী বয়সের সেই চরিত্রকে পর্দায় জীবন্ত করেছিলেন উমা। এরপর তাকে আর পর্দায় দেখা যায়নি। পেশাগত জীবনে তিনি ছিলেন শিক্ষক।

## অভিনেত্রী আফরোজা হোসেন আর নেই

ছোট পর্দার পরিচিত মুখ অভিনেত্রী আফরোজা হোসেন মারা গেছেন। ১০ নভেম্বর রাজধানীর কল্যাণপুরে নিজ বাসায় শেষ নিশ্বাস ত্যাগ করেছেন তিনি। সামাজিক যোগাযোগমাধ্যমে তার মৃত্যুর খবর নিশ্চিত করেছেন অভিনেত্রী মনিরা মিঠু। ২০২২ সালের সেপ্টেম্বরে জরায়ুর ক্যানসার ধরা পড়ে আফরোজা হোসেনের। তা ধীরে ধীরে ছড়িয়ে পড়ে মেরুদণ্ডের হাড়ে।



চিকিৎসার জন্য ভারতেও নেওয়া হয়েছিল তাকে। গত বছরের শেষ দিকে কিছুটা সুস্থ বোধ করলেও, অবশেষে মরণব্যাপির কাছে হার মানলেন তিনি। তিনি ১৯৮০ এবং ১৯৯০ এর দশকে বাংলাদেশের শোবিজ ইন্ডাস্ট্রিতে বেশ পরিচিত মুখ ছিলেন।




I HOPE  
YOUR DAY IS  
AS NICE AS  
YOUR HAIR





## Herbal Hair Care Oil

*Beauty, Cosmetic & Personal Care*

 [runa2208@gmail.com](mailto:runa2208@gmail.com)

 +880 1971-809295

 [facebook.com/Runa220](https://www.facebook.com/Runa220)

 **01971-809295**